

## Festival kebudayaan MSU rai hubungan Malaysia-Uzbekistan

Oleh [Azhar Shahrulnizam](#) - Julai 28, 2022 @ 4:39pm  
[bhnews@bh.com.my](mailto:bhnews@bh.com.my)



Kumpulan penari kebudayaan Uzbekistan bersama Presiden MSU, Prof Tan Sri Dr Mohd Shukri (enam dari kanan) dan Duta Besar Uzbekistan ke Malaysia Ravshan Usmanov (empat dari kiri) - Foto Ihsan MSU

KUALA LUMPUR: Management and Science University (MSU) menganjurkan Festival Kebudayaan Antarabangsa MSU sebagai platform memperkasakan hubungan antara Malaysia dan Uzbekistan.

Festival yang menggambarkan perkongsian nilai, tradisi dan pendidikan berikutan kunjungan delegasi kebudayaan Uzbekistan ke MSU dalam meraikan 30 tahun hubungan diplomatik di antara Malaysia dan Uzbekistan yang bermula melalui pembukaan pejabat kedutaan Malaysia di Tashkent pada tahun 1992.

Turut hadir Presiden MSU, Prof Tan Sri Dr Mohd Shukri Ab Yajid dan Duta Besar Uzbekistan ke Malaysia, Ravshan Usmanov.

Kebudayaan Uzbekistan yang unik dengan nilai sejarah menyaksikan tarian Lazgi tersenarai dalam senarai Pertubuhan Bangsa-bangsa Bersatu bagi Pendidikan, Sainifik dan Kebudayaan (UNESCO) di bawah kategori warisan budaya tidak ketara dunia.

Beberapa khazanah Uzbekistan lain yang turut tersenarai dalam UNESCO termasuk dari daerah tenggara Boysun, muzik Shahmaqom, hidangan tradisional Palov, Askiya (seni budaya) dan lagu tradisi Katta Ashula.

Pelbagai aktiviti dijalankan sepanjang seminggu delegasi Uzbekistan berada di MSU dalam mempromosikan kepelbagaian kebudayaan termasuk persembahan tarian tradisional, bahasa Uzbek serta pameran pakaian kebangsaan.

Kerjasama pintar MSU di Uzbekistan merentasi bidang Farmaseutikal dan Penjagaan Kesihatan, Pensijilan Halal, Latihan, Pertanian dan Penternakan.

Dalam bidang pendidikan pula menyaksikan kolaborasi MSU dengan universiti di Uzbekistan seperti Navoi State Pedagogical Institute, Bukhara State University, Bukhara State Medical Institute serta Samarkand State Institute of Foreign Languages.